

明史稿

明史稿

明史藁

列傳第五十二

光祿大夫 經筵講官明史總裁戶部尚書加七級臣王鴻緒奉

敕編撰

方瑛

陳友

孫

鏜

董興

曹義

李震

趙輔

仇

鉞

孫鸞

曹神英

雄子謙

方瑛都督政之子正統初以舍人從父征麓川政深入上江

逼賊援絕遣瑛去遂突陣死瑛發憤矢報父讐初襲金吾右

衛指揮使論政死事功遷都指揮同知六年從王驥征麓川

率兵六千突賊壘賊渠衣黃衣帳中瑛直前左右擊斬數百

人躡死者無算遂平其地進都指揮使尋復從驥破貢章沙

壩阿嶺諸蠻進都督僉事溫後府事充右參將協守雲南十三年復從驥征麓川破鬼山大寨留鎮雲南進都督同知景帝嗣位廷議以瑛有將略命都督毛福壽代還甫抵京而貴州羣苗叛道梗驥請瑛還討遂拜右副總兵與保定伯梁瑤侍郎侯璉次第破走之進右都督復破賞改諸砦擒偽苗王王阿同等璉卒都御史王來代督軍務分道擊賊香爐山瑛入自龍場大破平之景泰三年秋來劾瑛違法事置不問來召還命瑛鎮守貴州其冬討白石崖賊俘斬二千五百人招降四百六十砦進左都督五年四川草塘苗黃龍韋保作亂自稱平天大王剽播州西坪黃灘瑛與巡撫蔣琳會川兵進剿賊魁皆就縛因分兵克中潮山及三百灘乖西谷種乖立

諸砦執僞王谷蟻丁等斬首七千餘詔封南和伯瑛爲將嚴
紀律信賞罰臨陣勇敢善撫士士皆樂爲用以故數有功延
臣言宜委以禁旅乃召還同石亨督京營軍務明年琳奏瑛
前守貴州邊境寧苗蠻畏服乞遣還帝不許未幾湖廣苗叛
拜瑛平蠻將軍率京軍討之密使御史張鵬偵其後還奏瑛
所過秋毫不犯帝大喜七年賊渠蒙能攻平溪衛都指揮鄭
泰等擊卻之能中火槍死瑛遂進沅州連破鬼板等一百六
十餘砦與尚書石璞移兵天柱率陳友等分擊天堂諸砦復
大破之克砦一百七十禽僞侯伯以下一百二人時英宗已
復位捷聞召璞還命瑛留鎮貴州湖廣瑛討蒙能餘黨克銅
鼓藕洞諸砦一百九十五覃洞上隆諸苗咸斬賊渠納款帝

嘉其功進爵爲侯天順二年東苗千把豬等僭僞號攻都勻諸衛命瑛與巡撫白圭合川湖雲貴軍討之克六百餘砦邊方悉定瑛前後克諸砦幾二千俘斬四萬餘平苗之功前此無與比者尋卒於鎮年四十五帝震悼賜諡忠襄瑛天資英邁曉古兵法嘗上練兵法及陣圖老將多稱之爲人廉謙和不伐所至鎮以安靜民思之久而不忘子毅嗣伯爵服內姦父婢恐從父瑞發其事誘祖母誣瑞不孝坐奪爵閤住卒于壽祥嗣正德中歷鎮貴州湖廣傳爵至明臣乃絕友其先西域人家全椒正統初官千戶累遷都指揮僉事頻年使瓦剌有勞尋復進都指揮使九年充寧夏游擊將軍與總兵官黃直擊阿良哈多獲進都督僉事未幾出塞招答哈卜等四百

人奏歸景帝卽位進都督同知征湖廣貴州苗尋充左參將
守備靖州景泰二年偕王來等擊賊香爐山自萬潮山入大
破之留鎮湖廣論功進右都督四年春奏斬苗五百餘級五
年又奏斬苗三百餘而都指揮戚安等八人戰死兵部疑首
功不實指揮蔡昇亦奏友欺妄命總督石璞廉之斬獲僅三
四十人陷將士千四百人宜罪詔令殺賊自効天順元年隨
英征天堂諸苗大獲命充左副總兵仍鎮湖廣已又偕瑛破
蒙能餘黨召封武平伯予世券來犯邊充游擊將軍從安
遠侯柳溥等往禦率都指揮趙英等與戰敵敗遁再犯鎮番
復擊卻之俘斬百六十人尋佩將軍印充總兵官討寧夏寇
先是寇大入甘涼溥及總兵衛穎等不能禦惟友稍獲至是

巡撫芮釗列諸將失事狀兵部請免友罪詔并有溥等召還進侯卒傳子至孫綱弘治中請友贈諡詔贈沔國公諡武僖綱傳子勲及熹嘉靖中吏部以友征苗功多冒濫請停襲帝不從熹子大策復得嗣至明亡乃絕

孫鏜字振遠東勝州人襲濟陽衛指揮同知用朱勇薦進署指揮使正統末擢指揮僉事充右參將從徐恭討葉宗留敗賊金華復破之烏龍嶺會英宗北狩召還超擢都督僉事典三千營也先將入犯進右都督充總兵官統京軍一萬禦之紫荆關將發寇已入遂營都城外寇薄德勝門爲于謙等所卻轉至西直門鏜與大戰斬其前鋒數人寇稍北鏜逐之寇益兵圍鏜鏜力戰不解高禮毛福壽來援禮中流矢會召亨

兵至寇乃退詔鏜副楊洪追之戰於涿州深溝頗有斬獲師
還仍典營務景泰初楊洪劾鏜下獄石亨請赦鏜江淵亦言
城下之役惟鏜戰最力乃釋之三年冬充副總兵協郭登鎮
大同登節制嚴鏜不得逞欲與分軍且令子百戶宏侮登帝
械宏竟以鏜故貰之名還典三千營如故英宗復辟以奪門
迎駕功封懷寧伯尋予世券天順初甘肅告警詔鏜充總兵
官帥京軍往討將陞辭宿朝房夜二鼓太監曹吉祥昭武伯
曹欽反其部下都指揮馬亮告變於恭順侯吳瑾瑾趨語鏜
鏜草奏叩東長安門自門隙投入內廷始得集兵縛吉祥守
皇城諸門鏜走太平侯張瑾家邀兵擊賊瑾不敢出鏜倉猝
復走宣武街急遣二子輔軌呼征西將士紿之曰刑部囚反

獄獲者重賞衆稍聚至二千人始語之故時已黎明遂擊欽
欽方攻東長安門不得入轉攻東安門鎧兵追及賊稍散軌
斫欽中膊軌亦被殺欽知事不成竄歸其家猶督衆拒鎧力
戰至晡始定論功第一進爵世侯仍典三千營贈軌百戶世
襲鎧麤猛善戰然數犯法初賄太監金英得遷都督事覺論
斬景帝特宥之至是受將士賄纍千金坐解營務及府軍前
衛事猶掌左府憲宗初中官牛玉得罪鎧坐與玉婚停祿閒
住尋陳情予半祿已復自陳功狀給全祿如初成化七年卒
贈涑國公諡武敏子輔請嗣侯吏部言奪門功例不得世傳
帝以鎧捕反者予之傳子至孫應爵正德中總督團營四傳
至曾孫世忠萬曆中鎮守湖廣總督漕運凡二十年又三傳

平孫維藩流賊陷京師被殺鏜之冒奪門功封伯爵也都督
董興亦冒功封而曹義施聚趙勝等皆乘是時倖封予世券
天下以爲濫興長垣人初爲燕山右衛指揮使累遷署都指
揮同知正統中新建伯李玉等舉興將才進署都指揮使京
營管操復用薦擢署都督僉事充右參將從寧陽侯陳懋討
鄧茂七破餘黨於建寧進都督同知黃蕭養者南海人眇一
目有智數爲盜繫都司獄踰年所臥竹床忽青漸生葉其黨
以爲瑞蕭養因謀使人潛納利斧飯中同繫百七十人悉破
械出劫庫收兵仗嘯衆海濱旬月間至萬餘人圍廣州安鄉
伯張安都指揮王清戰死賊衆至十餘萬僭稱順天王建元
署百官僞尊其父大綱爲太王立子貳仔爲太子攻城益急

詔拜興左副總兵調江西兩廣軍往討而以侍郎孟鑑贊理軍務興用天文生馬軾自隨至江西夜半聞雞鳴軾曰雞鳴不以時由賞罰不信也願公嚴軍令興果銳不能戢下故以是戒之景泰元年二月師至廣州賊舟千餘艘勢張甚而我徵兵未至諸將請濟師軾曰廣民延頸久矣所徵狼兵驍悍往擊猶拉朽耳興從之旣而兵大集進至大洲頭擊賊殺溺死者萬餘人餘多就撫蕭養中流矢死函首以獻俘僞太王太子等餘黨皆伏誅論功進右都督留鎮廣東給事中黃士儁劾興寬縱降爲事官明年復職久之召還分督京營與曹吉祥結爲姻冒奪門功封海寧伯未幾充總兵官鎮遼東予世券例革奪門者爵興以守邊得免吉祥反誅乃奪興爵仍

右都督發廣西立功以錦衣呂貴薦復爵總兵宣府再予世
券憲宗嗣位罷還已停世襲家居十餘年卒義字敬方儀直
人襲職爲燕山左衛指揮僉事累功至都督僉事充遼東副
總兵代巫凱爲總兵官凱名將義示其後廉介有守遼人安
之爲部下將所訐詔宥義兀良哈犯廣寧前屯殺掠百八十
人詔切責命王翱往飭軍務誅義死罪狀頃之義等獲犯邊
孛台等詔戮於市自是義數與兀良哈戰九年春會朱勇軍
夾擊斬獲多進都督同知十二年春出廣寧塞斬兀良哈百
餘人進右都督十四年追寇開原塞外旣又出廣寧敗寇禽
百餘人進左都督義部將施聚其先沙漠人居順天通州父
忠爲金吾右衛指揮使從成祖北征陣歿聚嗣職從北征擒

可可帖木兒宣德中備禦遼東累擢都指揮同知以義薦進都指揮使守備義州義與兀良哈戰聚皆從累官右都督景帝立充右副總兵仍守義州也先逼京師詔聚與左副總兵焦禮入衛聚慟哭即日引兵西部下進牛酒聚卻之曰天子安在吾何心饗此比至寇已退乃還而義守遼東脫脫不花以三萬騎深入毀屯堡八十餘大掠而去于謙等請治罪帝以時多故止奪半歲俸已寇復入掠義敗之連洲稍還所掠人口寇勢盛義等所獲十餘級而已英宗復辟召還義守遼垂二十年無大功聚以勇敢稱官至左都督然爲義裨帥未嘗特將值英宗推恩特封義豐潤伯聚懷柔伯義居四年卒贈侯諡莊武繼室李氏殉詔旌之孫振嗣坐居喪納妓下詔

獄革冠帶踰年復之成化中坐與僧妓飲下獄停祿一年卒
子愷嗣弘治中總兵貴州賊頗米魯叛被劾罷還久之卒傳
子棟及松松嘗協守南京改鎮兩廣聚後義二年卒贈侯諡
威靖再傳至孫鑑成化中坐納賂減死奪爵謫貴州立功遇
赦復爵卒子瓚嗣正德初總兵貴州卒弟瑾嗣義三傳至棟
聚四傳至瑾嘉靖時吏部皆言不當復襲世宗不許傳爵至
國亾乃絕勝字克功遷安人襲職爲永平衛指揮使正統末
禦寇西直門進都指揮僉事天順初與孫鏜等預奪門功超
遷都督僉事又與鏜擊反者曹欽進同知李來犯甘肅勝與
李杲充左右參將從白圭西征至固原擊寇卻之憲宗立典
鼓勇營訓練成化改元山西告警拜將軍次雁門寇已退乃

還明年復出延綏禦寇會方納款遂旋師尋典耀武營四年
充總兵官鎮遼東七年召典五軍營已改三千營卽加思蘭
犯宣府詔勝爲將軍統京兵萬人禦之亦以寇遁召還久之
進左都督加太子太保十九年封昌寧伯勝初與李杲竝有
名後屢督大師未見敵無功以資緣得封物論大駭後加太
保營萬貴妃瑩墜崖石間死贈侯諡莊敏弘治初孫鑑乞襲
爵吏部言勝無功不當傳世乃授錦衣衛指揮使

李震南陽人父謙都督僉事震襲指揮使正統九年從征兀
良哈有功進都指揮僉事已從王驥平麓川進同知景帝卽
位充貴州右參將擊苗於偏橋敗之景泰二年從王來征韋
同烈破鎖兒流源諸砦斬千六百人共克香爐山獲同烈

進都指揮使守靖州尋坐罪徵還方瑛討苗乞震隨軍詔許
立功贖已從瑛大破天堂諸苗命仍充左參將瑛平銅鼓諸
賊震亦進武岡克牛欄等五十四砦斬獲多進都督僉事天
順三年復從瑛平干把豬瑛卒卽以震充總兵官代鎮貴州
湖廣初麻城人李添保以通賊逃入苗中僞稱唐太宗後衆
萬餘僭王建元武烈以故賊魁蒙能子聰爲帥剽掠遠近震
進擊大破之添保遁入貴州鬼池諸苗中復誘羣苗出掠震
擒之送京師尋破西堡苗五年春勦城步徭獍攻橫水城溪
莫宜中平諸砦皆破之長驅至廣西西延會總兵官過興軍
克十八團諸徭前後俘斬數千人其冬命震專鎮湖廣以李
安充副總兵守貴州明年夏率師由錦田江華抵雲川桂嶺